



VERSCHNUUFFER

Fasnacht 2009

Mir e-missioniere

E-Mission fir unser aller Umwälttheil!

Wenn s wärmer wird, no wird s aim wool.
Vo Droge oder Alkohol,
vo Liebi oder Sunneliecht,
jo was der Mensch äggscht ooni miecht?
E Chemineefyyr wenn s dusse schneyt;
wenn Dir vor Kelti s Gsicht abkeyt
no wintschisch Dir e haisse Punsch
und hoffsch, dass bald an d Wäirmi kunnsch.

Doch schetzt me d Wäirmi nur punktuell,
wird si global und generell,
no isch glyy d Gmietligkait passé.
S wird jeedem klar: S muess ebbis gschee.
Mit Gschnuur ellai sin mir nimm z rette,
konkrete Plän sin s, wo mir wette.
S feen d Pol aa schmelze, s Wasser styggt
- hän mir ys d Zuekunft scho vergygt?

Wenn d Meeresspiegel aafeen stygge,
no ka sich d Schwyz nur d Finger ryybe:
Europa muesch bald nimme gsee,
s isch Schänge denn kai Thema mee.
Der UBS wurd d Kasse klinge,
well alli d Stütz ans Drogne bringe.
Der Steibrück singt sy Schwaanegsang
und luegt der Film: Der Untergang!

Doch nai, so wyt derf s gar nid ko,
als Retter sin mir schliesslig do!
Im Staub isch ys e Gaischt erschiine
- voor lutter Fyynstaub muess är gryyne –
uff E-Mission wott är ys schigge,
bevoor mir all mien verstigge.
Är git ys 10 Gebott in d Hand
und schiggt ys loos, ins dräggig Land.

S isch allne klar, wo mit ys plaane:
E Sindebogg muess sofort aane!
S muess aine syy, wo s guet ka pagge,
wenn alli uf em ummehagge.
E bitzli Nyyd spiilt au no mit,
denn ooni dä goot s byy-n-is nid.
So wird ys klar: Tschuld an däm Drägg
sin d Offroad-Gläpf! – Die mien ewägg!

Die Offroad-Faarzyyg – s isch zem Gruuse –
leen Abgas us em Usspuff uuse
und luege-n-aim au ganz bees aa
- im Grund mecht jeede so ain ha!
Die Gläpf, wo nid do aane gheere,
und unser Aug und Woolsyy steere,
wänn mir ganz gschwind vo do verbanne,
au wenn mir d Bsitzer so entmanne!

Mir wänn au wytre Umwältsinde
ganz offiziell der Kampf aakinde:
S isch d Fasnacht s E-Missionebabel,
vom Sindepfuul so gseit der Nabel.
So soll me z Fuess an d Fasnacht ko,
kai Röppli sottsich me falle loo,
der Ziiblewaije sollsch entsaage
und d Chaise-Ross mien Windle traage!

Verkeersfrey syy soll nid nur d Strooss,
nai, grad dehai isch d Wirggig grooss!
Fir s suuberscht Land uf däm Planet
sin mir Bewooner obsolet.
S duet d PFZ ys garantiere,
dass niemerts me ka immigriere.
Vilicht goot das e weeni z wyt,
das wird sich zaige mit der Zyt.

Als Missionar uff E-Missione
zien mir ins Land und s wird sich loone!
Verswinde wärde d Offroad-Kische,
s mien d Buure wider z Fuess go mischte.
Global wird s kälter, Dangg däm Ganze,
und straalend friere mir an Ranze.
Mir nämme schlotternd ys am Arm
- und hätte doch vyyl lieber warm...

D'Latärne Usstellig findet wie immer vom Mäntig Z'Obe
bis am Mittwoch Vormittag uff em Minschterplatz statt.
